

La buyée , dinltins

Dinltins, la buyée ére ène ovradge k' on n' fujot k' deus côps par an, Mês pouz î ariver, i falot ène fameuse rèsèrve du lindje, du twârtchons, des draps d' mwin, du sâros, du chmîjes du fames et d'oumes. I gn'avot k' les ritches ki plint s'pèrmète çà. Et i n'tchandjint nin du tchmîje tous les djoûs.

Les ôtes, ki n'avint nin du lindje à foûjon, lavint toutes les smwin.nes û tous les 15 djoûs

La lèchive purdot alors 3 bons djoûs. Et c'ére pu malâji k'anute. Les lindjes n'astint nin cè k'is sont asteure. Onz avot des spèsses cotes du lin.ne et souvint des grosse twayes. . Pou l'hygiène, les fames astint mwins rwêtantes k' anute. Iles duvint fwêre avu ç' k'i gn'avot.

I falot cminçî pa mète trimper l'lindje à l'êwe du plûve, k'astot pûs douce, dins ène grande bassine, lu djoû du dvant. Lu landmwin, cand il avot bin trimpé, on l' sutwârdot et on l'mètot à l'êwe tchôde dins la bouleuse , avu des çades ki vnint du four à pwin mètuwes dins in pitit satch. L'êwe du plûve voûdie sul l'lindje avu les çades lî apwartot la potasse ki fjot blantchi, mêt i n' falot pont d' çades di tchène. Iles tatchint l'lindje.

Les prèmîres bouleuses astint des grandes cuves du fonte, avu in bûzê ou dzous. On ramassot l'êwe tchôde ou bûzê et on la rvoudot sul lindje pou k' la potasse fwêje su-n éfèt. C'est dîre k'i falot voûdi souvint. On djot : «couler la lèchive »

Par après, ont vnu les bouleuses pus modernes k'astint brâmint pu lèdjîres et pû pratikes. Dussus in doube fond avu des trôs, s'amantchot ène espèce tuyô ki finichot an parapluie, èyu k' l' êwe tchôde du fond montot pouz arouzer l'lindje à fwêt. Les çades du dèbut ont fwêt place ou nwâr savon et ou savon d'Marsèye.

Cand ça avot dèré assez, on rustwârdot l'lindje et l'mète dins ène banse su la berwète pouz aler al fontin.ne. Dins les viadjès, cè k'on loumot ène fontin.ne, c'ére in bâtimint avu des batchs à laver et à ruspâmer couplés à l'uche à des longus batchs pou les vatches bwâre à rintrant dul pature û d' les awè sté wârdèr.

Là, agnoléyes dins la bwate à laver, pou n'nin s' frèchi, les laveuses frotint al brouche du chindant et ou savon les taches k'avint dmèré, on batot l'lindje avu ène bate et on l' ruspâmot dins l' batch du dzeu. Co stwârdû in côp, lu lindje astot bon à mète al rumoye su la hiêbe du pachi.

Ene pratike k'il è falu abandonner tins des guêres, pou les voleurs, ki n' su jin.nint wêre pou rgarni leus ârmêres.

Nouzôtes, al gare, à pîd du talus de trin, onz avot fwêt ène fontin.ne avu des poutrêles, in pô dzous l' chourd k' ére 50 pus hyôt.

D'astins adon dins in tayis ki siêrvot d' tindrêe ou Pére Jadoul. La place dul fontin.ne avot sté dègadjîe. Nosse mère et les djans du culot purdint l' pazê dins l' bwès pouz î aller. Les djans dlé la gare î alint à dchindant in pazê dins l'talus du tram et k'ére bin fatigant à rmonter avu les bèrwètes.

Nôs fames wèyint bin du timp adon. Heureusmint, ça è tchandjî.

Les problèmes d'êwe s'ont amèlioré avu la distribucion an 1936. Les machines à débete lu lindje al mwin ont fwê place al machine électrique. La kerwée s'adouçicot, mès il è falu mwintes anéyes pouz î ariver. Les essoreuses à roulés, k'astint djà bin pratikes ont dvu céder d'vant les machines modernes programabes et les essoreuses à tambour.

Les sèchwârs à lindje ont achèvé d'rinde la buyée du d'dinltins, ène buzogne bin pus simpe et pûs rapide, ki s' fwê minme tins d' par nute. In progrès k'orot sbaré mwintes du nôs grand-mères.

Du s' costé, l'industrie des savons et des détergents fujot des progrès formidables. Les études su l'hygiène rucoumandées p'âs mèdcins ont permis d'èradiker les èpidémies anciènes ki vnint souvint du l'ignorance.

Az atindant, la vîe buyée est fwê la rnomée du viadje du Poupehan. Là, lu mustî d' lavandières astot rcounu jusk' à Sedan, èyû k' îles alint kê la buyée à dos et la rpwârter in côp la bzogne fwête.

Il est bin lon, ç'timp-là. Vât mî s'a souvnu ku d' l'awè counu ! Et co ! ...

Louis Baijot 11/4/2012.